

AD MAIOREM
DEI GLORIAM

BVLLE
APOSTOLICÆ,
QVÆ IIS,

*Qui in prima Probatione, Cate-
risque Novitys Societatis
IESV ostendi solent.*

ROMÆ, In Collegio Rom.
eiusdē Societat.

Anno Dñi
MDCVI.






C O N F I R M A T I O

*Alia instituti cum maiori, tum illius,
tum aliorum Societatis indul-
torum declaratione.*

M. D. L.



IV LIVS EPISCOPVS

*seruus seruorum Dei, ad perpe-
tuam rei memoriam.*

XP O S C I T debitum pasto-
ralis officij, cui nos licet imme-
E R I T O S, prætulit diuina Maiestas;
vt fideles quoslibet, præsertim
religiosos, in via mandato-
rum Domini ad illius honorem, & gloriam
& proximorum spiritualem profectum de-
ambulantes, paternis confoeamus affecti-
bus: vt fideles ipsi, dextera Domini sibi assi-
stente propitia, æternæ salutis præmium
feruentius exquirant, & in eorum pio pro-
posito confoeantur. Dudum siquidem, per
felicis recordationis Paulum Papam Ter-
tium prædecessorem nostrum, accepto, Quod
dilecti filij, Ignatius de Loyola, & Petrus Fa-
ber, ac Iacobus Laynez, necnon Claudius
Iaius, & Paschasius Broet, ac Franciscus Xa-
uier, necnon Alfonsus Salmeron, & Simon

Summa lit-
terarum Apo-
stolicarum
Pauli iij. de
Instituto So-
cietatis.

I V L I I Rodericus , ac Ioannes Coduri , & Nicolaus
 III. de Bobadilla , presbyteri , Pampilonen. Gebennan. Seguntin. Toletan. Vilen. Ebredunen. & Palentin. ciuitatum & dioc. in Artibus magistri , in Vniuersitate Parisien. graduati , & in Theologicis studijs , per plures annos exercitati , Spiritu sancto afflati , iamdudum è diuersis mundi regionibus decedentes , in vnum conuenerant : & exemplaris , ac religiosæ vitæ Socij effecti , abdicatis huius sæculi illecebris , eorum vitam perpetuò Domini Nostri I E S V Christi , atque suo , & successorum suorum Romanorum Pontificum seruitio dedicauerant : & iam pluribus annis verbum Dei prædicando , & fideles priuatim ad pias meditationes , beneque ac beate viuendum excitando , hospitalibus inferuendo , pueros & alios rudes salubria dogmata , ad Christiani hominis institutionem necessaria docendo , ac denique omnia caritatis officia , quæ ad animarum ædificationem pertinebant , vbique terrarum , vbi peregrinati fuerant , quisque iuxta traditam sibi ab ipso Spiritu sancto gratiam , multa cum laude obeundo , laudabiliter in vinea Domini se exercuerant : eorum institutum , sub quadam viuendi formula ab ipsis edita , Euangelicæ veritati , & sanctorum patrum sanctionibus conformi , vt vinculum caritatis , & vnio in ipsis quidem Socijs , & alijs ,
 qui

qui prædictum vellent institutum sequi, con- I V L II
feruarentur, approbavit, & confirmavit, &
benedixit: ipsosque Socios, quorum nume-
rum, non vltra sexaginta esse tunc voluit,
sub sua, & Apostolicæ sedis protectione su-
scipit; illisque condendi Constitutiones, &
statuta quæcunque ad ipsius sic institutæ,
& confirmatæ Societatis conseruationem,
& felicem progressum, licentiam concessit
per quasdam. Cumque postmodum pro-
gressu temporis, Spiritu sancto cooperante,
ex Societate prædicta spiritualem animarum
fructum crescere; & multos, qui institutum
prædictum sequi vellent, in Parisien. & alijs
generalium studiorum Vniuersitatibus, stu-
dere intellexisset, idem prædecessor, Igna-
tij, & aliorum Sociorum prædictorum,
piam vitam, & doctrinam attendendo, ei-
dem Societati, vt quoscunque alios idoneos,
& iuxta suas Constitutiones probatos libe-
re admittere posset, concessit. Et nihi-
lominus, vt Coadiutores tam Presbyteros,
qui in spiritualibus, quam laicos; qui in
temporalibus, & domesticis officijs eos
adiuarent (qui quidem Coadiutores pera-
tis probationibus, iuxta Constitutiones
Societatis huiusmodi requisitis, ac maio-
rem deuotionem suam, & meritum etiam
tria vota, Paupertatis videlicet, Castitatis,
& Obedientiæ possent emittere, non so-

I V L I I lemnia, sed quibus, pro eo tempore quo Præ-
III. positus Generalis Societatis prædictæ eis
 in ministerio spirituali, vel temporali vtend-
 dum iudicaret, astringerentur: quique om-
 nium bonorum operum, quæ in dicta
 Societate fierent, ac meritorum omnium,
 participes fierent, perinde, vt qui solem-
 nem professionem in eadem Societate
 emisissent) possent assumere; & alias gra-
 tias, ac priuilegia ad fouendam, & adiu-
 uandam in ijs, quæ ad Dei honorem, &
 animarum salutem pertinebant, Societa-
 tem prædictam, de benignitate Apostolica
 concessit. Vt autem prædicta omnia
 prius ab eodem prædecessore concessa,
 magis confirmentur, & simul omnia, quæ
 ad institutum prædictæ Societatis perti-
 nent, eisdem in litteris aliarum summam
 continentibus comprehendantur, & vt ali-
 qua obscurius dicta, & quæ scrupulum,
 ac dubitationem possent iniicere, per nos
 exactius explicentur: nobis fuit humiliter
 supplicatum, vt formulam qua prædictæ
 Societatis institutum exactius, & distin-
 ctius, quam antea, edocente experientia,
 ac usu rerum, expressum, eodem tamen
 spiritu comprehenditur confirmare dignare-
 mur, cuius tenor sequitur, & est talis. Qui-
 cunque in Societate nostra, quam Iesu no-
 mine insigniri cupimus, vult sub crucis ve-
 xillo

Instituti So-
 cietatis for-
 mula.

xillo Deo militare, & soli Domino, ac Ec- I V L I I
 clesie ipsius sponsæ, sub Romano Pontifice, III.
 Christi in terris Vicario seruire, post solemne
 perpetuæ Castitatis, Paupertatis, & Obedien- Vota pau-
 tiæ votum, proponat sibi in animo, se par- pertatis, ca-
 tem esse Societatis, ad hoc potissimum insti- stitatis, &
 tutæ, vt ad fidei defensionem, & propaga- obediētiz.
 tionem, & profectum animarum in vita, & Finis insti-
 doctrina Christiana per publicas prædicationes, tutioni.
 lectiones, & aliud quodcunque verbi
 Dei ministerium, ac spiritualia exercitia, pue- Puerorum
 rorum, ac rudium in Christianismo institu- ac rudium
 tionem, Christi fidelium in confessionibus au institutio.
 diendis, ac cæteris Sacramentis administran-
 dis, spiritualem consolationem præcipuè in-
 tendat: & nihilominus ad dissidentium re-
 conciliationem, & eorum, qui in carceribus,
 vel in hospitalibus inueniuntur, piam subuen-
 tionem, & ministerium, ac reliqua caritatis Operum ca-
 opera, prout ad Dei gloriam, & commune ritatis exer-
 bonum expedire visum erit, exequenda gra- citia, quæ
 tis omnino, & nullo pro suo in prædictis om- gratis om-
 nibus labore, stipendio accepto, se vilem- nino exhi-
 exhibeat; curetque primo Deum, deinde benda sunt.
 huius sui instituti rationem, quæ via quæ-
 dam est ad illum, quoad vixerit, ante oculos
 habere, & finem hunc sibi à Deo propositum
 totis viribus assequi, vnusquisque tamen se-
 cundum gratiam sibi à Spiritu sancto submi-
 nistratam, & vocationis suæ proprium gra-
 dum.

I V L I I

III.

Officiorum
distributio.De conden-
dis consti-
tutionibus.Præpositus
habet aucto-
ritatem de-
clarandi In-
stitutū Con-
siliū ad gra-
uiora con-
uocandum.In his quæ
nō tantimo-
menti sunt,
ius tantum
habet Præ-
positus.

dum. Ideoque, nequis forte zelo vtatur, sed non secundum scientiam, proprij cuiusque gradus iudicium, & officiorum discretio, ac distributio tota sit in manu Præpositi Generalis seu Prælati per nos quocunque tempore eligendi, vel eorum, quos ipse sibi ea cum auctoritate substituerit, vt congruus ordo seruetur in omni bene instituta communitate necessarius. Qui quidem Præpositus de consilio consociorum, Constitutiones ad constructionem huius propositi nobis finis conducentes condendi, maiori suffragiorum parte semper statuendi ius habente, & quæ dubia esse poterūt in nostro instituto, hac formula comprehenso, declarandi auctoritatem habeat. Consilium vero necessario conuocandum ad condendas, vel immutandas Constitutiones, & alia grauiora, vt alienare, vel dissoluere Domos, ac Collegia semel erecta, intelligatur esse maior pars totius professæ Societatis (iuxta Constitutionum nostrarum declarationem) quæ sine magno incommodo potest à Præposito Generali conuocari. In alijs, quæ non ita magni momenti sunt, idem Præpositus adiutus, quatenus ipse opportunum iudicabit, fratrum suorum consilio, per seipsum ordinandi, & iubendi quæ ad Dei gloriam, & cōmune bonum pertinere in Domino videbantur, ius totum habeat, prout in Constitutionibus eisdem explicabi-

cabitur. Quicunque autem in hac Societate I V L I I
professionem emiserint, non saluta in primis III.
professionis suę foribus intelligāt, sed quoad vi
xerint, memores sint, Societatem hanc vniuer
sam, & singulos, qui in ea profitentur, sub
Sanctissimi Domini nostri Pauli Papę Tertij,
& aliorum Romanorum Pontificum succes
sorum eius fideli obedientia Deo militare.
Et quamuis Euangelio doceamur, & fide
orthodoxa cognoscamus, ac firmiter tenea
mus, omnes Christi fideles Romano Ponti
fici, tanquam capiti, ac I E S V Christi Vi
cario subesse: ob deuotionem tamen maio
rem ad obedientiam sedis Apostolicę, &
maiores voluntatum nostrarum abnega
tionem, & certiores sancti Spiritus dire
ctionem summopere conducere iudicaui
mus, singulos nos, & quicunque ean
dem in posterum professionem emiserint,
vltra illud commune trium votorum vin
culum, speciali ad hoc voto astringi, vt quid
quid modernus, & alij Romani Pontifi
ces, pro tempore existentes iusserint ad
profectum animarum, & fidei propagatio
nem pertinens, & ad quascunque pronin
cias nos mittere voluerint, sine vlla tergiver
satione aut excusatione illico, quantum
in nobis fuerit, siue nos ad Turcas siue ad
quoscunque alios Infideles, etiam in parti
bus, quas Indias vocant, siue ad quoscun
que

Speciale vo
ti obedi
di Romano
Pontifici.

I V L I I que Hæreticos, Schismaticos, seu etiam
III. ad quouis fideles, mittendos censuerit, ex-
 Ingressuri qui teneamur. Quamobrem qui ad nos ac-
 Societatem cessuri sunt, antequam huic oneri hume-
 quid consi- ros supponant, diu multumque mediten-
 derare de- tur, an tantum pecuniæ spiritualis in bonis
 bent. habeant, vt turrim hanc iuxta consilium,
 Dominicum possint consummare: hoc est,
 an Spiritus Sanctus, qui illos impellit, tantum
 illis gratiæ polliceatur, vt huius vocationis
 pondus, illó adiuuante, se laturos sperent:
 & postquam, Domino inspirante, huic
 IESV Christi militiæ nomen dederint,
 die, noctuque succincti lumbos, & ad tam
 grandis debiti solutionem prompti esse
 debebunt. Ne qua autem possit esse inter
 nos missionum, aut prouinciarum huiusmo-
 di ambitio, vel detrectatio, intelligant singuli,
 sibi per se, vel alium, de huiusmodi missio-
 nibus quodquam cum Romano Pontifice,
 non esse curandum, sed omnem hanc curam
 Deo, & ipsi Pontifici tamquam eius Vica-
 rio, & Societatis Præposito, dimittendam:
 cui quidem Præposito, sicut cæteris, nihil
 de sui ipsius missione in alterutram partem,
 nisi de Societatis consilio, cum dicto Pon-
 tifice curandum erit. Voueant etiam sin-
 guli, se in omnibus, quæ ad regulæ huius
 nostræ obseruationem faciunt, Societatis
 Præposito, qui ad hoc munus, quam fieri
 possit

Missiones
non procu-
randæ.

Votum obe-
dientiæ.

possit idoneus, ad plura vota, prout in Constitutionibus declarabitur, eligetur, obediētes fore. Ille autem, omnem eam auctoritatem, & potestatem habeat supra Societatem, quæ ad bonam eiusdem Societatis administrationem, correctionem, & gubernationem utilis erit. Iubeat autem ea, quæ ad constructionem propositi sibi à Deo & à Societate finis, cognouerit esse opportuna: & in prælatione sua benignitatis, ac mansuetudinis, caritatisque Christi, Petri, Paulique formulæ semper sit memor: & tam ipse, quam consilium prædictum ad normam hanc assidue spectent. Singuli vero subditorum tum propter ingentes ordinis utilitates, tum propter nunquam satis laudatum humilitatis assiduam exercitium, non solum Præposito in omnibus, ad institutum Societatis pertinentibus, parere, semper teneantur; sed in illo Christum, veluti præsentem agnoscant, & quantum decet, venerentur. Cum autem experti fuerimus, iucundiores, puriores, & ad proximi ædificationem aptiores esse vitam, ab omni auaritiæ contagione quam remotissimam, & euangelicæ paupertati quam simillimam; cumque sciamus Dominum nostrum Iesum Christum, seruis suis regnum Dei solum inquirentibus, necessaria ad vitam, & vestitum esse subministraturum,

sic

I V L I I
III.

Præpositi
electio, &
potestas.

Gubernandi ratio.

Obedientiæ
subditorum
erga Præpositum.

Paupertatis
Votum.

I V L I I

H I.

Professi, &
eorum Do-
mus hō pos-
sunt habere
redditus.

sic voueant singuli, & vniuersi perpetuam Paupertatem, vt non solum priuatum, sed neque etiam communiter possint Professi, vel vlla eorum Domus, aut Ecclesia ad aliquos prouentus, redditus, possessiones, sed nec ad vlla bona stabilia, præter ea, quæ opportuna erunt ad vsum proprium, & habitationem, retinenda, ius aliquod ciuile, acquirere, rebus sibi ex caritate donatis ad necessarium vitæ vsum contenti. Quia tamen Domus, quas Dominus dederit, ad operandum in vinea ipsius, & non ad scholastica studia exercenda destinandæ erunt: cum valde opportunum fore alioqui videatur, vt ex iuuenibus ad pietatem propensis, & ad litterarum studia tractanda idoneis, operarij eidem vineæ Domini parentur, qui Societatis nostræ, etiam professæ velut quoddam seminarium existant, possit professæ Societas ad studiorum commoditatem, Scholarium habere Collegia, vbicunque ad eā construenda, & dotanda ex deuotione aliqui mouebuntur: quæ simul atque constructa, & dotata fuerint (non tamen ex bonis, quorum collatio ad sedem Apostolicam pertinet) ex nunc auctoritate Apostolica erigi supplicamus, seu pro erectis haberi: quæ Collegia possint habere redditus, census, seu possessiones, vñibus & necessitatibus studentium applicandas, reten-

De Colle-
gijs, & eo-
rum reddi-
tibus.

ta penes Præpositum, vel Societatem omnimoda gubernatione, seu superintenduntia super dicta Collegia, & prædictos studentes, quoad Rectorum, seu gubernatorum, ac studentium electionem, ac eorundem admissionem, emissionem, receptionem, exclusionem, statutorum ordinationem, & circa studentium instructionem, eruditionem, ædificationem, ac correctionem, victus, vestitusque, & aliarum rerum necessariarum, eis ministrandarum modum, atque aliam omnimodam gubernationem, regimen, ac curam, vt neque studentes dictis bonis abuti, neque Societas Professa in proprios vsus conuertere possit, sed studentium necessitati subuenire. Qui quidem studentes ingenij & morum indole tales esse debebunt, vt merito speretur, post absoluta studia ad Societatis functiones idoneos fore: & sic demum post cognitum in spiritu, & litteris eorum profectum, & post sufficientem probationem in Societatem nostram admitti possint. Socij autem omnes cum presbyteri esse debeant, ad dicendum officium secundum communem Ecclesiæ ritum, sed priuatim & non communiter, vel in choro, teneantur: & in ijs, quæ ad victum, & vestitum, & cætera exteriora pertinent, honestorum sacerdotum communem, & approbatum vsum sequentur, vt quod inde pro cuiusque

ne-

I V L I I
III.Collegiorum
gubernatio
penes Præ-
positum, vel
Societatem
est.De officio
diuino reci-
tandoIn victu, &
vestitu se-
qui debe-
mus vsum
communem
honestorum
sacerdotum.

V L I I necessitate, vel spiritualis profectus desiderio
III. substractum fuerit, ex deuotione, & non ex obligatione, rationabile obsequium corporis Deo, prout expediet, offeratur. Hæc sunt, quæ sub præfati Domini nostri Pauli, & sedis Apostolicæ beneplacito, de nostra professione, typo quodam explicare potuimus, quod nunc fecimus, vt summam informaremus tum illos, qui nos de nostro vitæ instituto interrogant, tum etiam posteros nostros, si quos Deo volente, imitatores vnam habebimus huius vitæ. Quam cum multas, magnasque habere annexas difficultates fuerimus experti, opportunum iudicauimus, etiam statuere, ne quis ad professionem, in hac Societate emittendam, nisi diuturnis, & diligentissimis probationibus, prout in Constitutionibus declarabitur, eius vita & doctrina explorata fuerit, recipiatur quia re vera: hoc institutum, omnino humiles & prudentes in Christo, & in Christianæ vitæ puritate, ac litteris conspicuos exigit. Imò & ij, qui in Coadiutores tam in spiritualibus, quam in corporalibus, & in Scholares admittentur, quorum vtrique, post sufficientes probationes, & tempus in Constitutionibus expressum, vota sua, ad deuotionem, & meritum maius, non quidem solemniter (præter aliquos, qui de licentia Præpositi Generalis, propter

Ad profes-
 sionem non
 admittatur
 nisi diu mul-
 tumq; pro-
 bati.

Coadiuto-
 res, & scho-
 lares vota
 sua debent
 emittere.

pter ipsorum deuotionem, & personarum I V L I I
 qualitatem, tria vota huiusmodi solemnia. III.
 facere poterunt, sed quibus teneantur, Aliqui tria
 quamdiu Præpositus Generalis in Societa- vota solem-
 te eos retinendos esse censuerit) emitte- nia emitte-
 debeant, prout in Cōstitutionibus latius expli- re possunt.
 cabitur, non nisi diligenter examinati, & ido- Idonei coa-
 nei reperti, ad eundem finem Societatis, ad diutores, &
 mittantur ad hanc IESV Christi militiā, qui scholares
 tenuibus cœptis nostris fauere dignetur, ad debent ad-
 gloriam Dei Patris, cui soli sit semper decus, mitti.
 & honor in sæcula, amen. Quapropter cōside-
 rantes, nihil, quod pium sanctumque nō sit in
 dicta Societate, eiusque laudabilibus institu-
 tis, ac exemplari Ignatij, & aliorum Sociorum
 prædictorum vita, & moribus reperiri; eaque
 omnia ad suorum, & aliorum Christi fidelium
 animarum salutem, & fidei exaltationem ten-
 dere: Socios, ac illorum Coadiutores prædi-
 ctos, & ipsius Societatis Scholares à quibus-
 uis excommunicationis, suspensionis, & inter-
 dicti, alijsque ecclesiasticis sententijs, censu-
 ris, & poenis à iure, vel ab homine quauis
 occasione, vel causa latis, si quibus quomodo-
 libet innodati existunt, ad effectum præsen-
 tium dumtaxat consequendum, harum serie
 absoluentes, & absolutos fore censentes, il-
 losque sub nostra, & Apostolicæ sedis prote-
 ctione suscipientes, Mōtu proprio, & ex
 certa nostra scientia, auctoritate Apostolica,
 teno-

Approba-
 tur, & con-
 firmatur in
 stitutum &
 Priuilegia
 concessa.

I V L I I
III.

tenore præsentium, erectionem, & institutionem Societatis, ac extensionem numeri illius Sociorū, ac receptionis, & admissionis Coadiutorum, ac omnia, & singula Priuilegia, immunitates, exemptiones, libertates, & concedendi, & alterandi statuta, & ordinationes, ac alia quæuis indulta eisdem, Societati, & illius Præposito per prædecessorem nostrum, & sedem huiusmodi, sub quibuscunque tenoribus, & formis concessa, & confirmata, ac desuper confectas, tam sub plumbo, quam in forma brevis litteras, & in eis contenta, ac inde secuta quæcūque, perpetuò approbamus, & confirmamus, ac eis perpetuæ firmitatis robur adiicimus, suppletes omnes, & singulos tam Iuris, quam facti defectus, si qui interuenerint in eisdem. Eaque omnia & singula perpetuæ, & inconcussæ firmitatis robur obtinere, & inuiolabiliter obseruari debere, & sic per quoscunque Iudices, & Commissarios, quauis auctoritate fungentes, subblata eis, & eorum cuilibet quauis aliter iudicandi, & interpretandi facultate, & auctoritate, iudicari, interpretari, atque decidi debere; necnon quidquid secus super his per quoscunque, quauis auctoritate, scienter, vel ignoranter cōtigerit attentari, irritū & inane decernimus, & declaramus. Quocirca vniuersis, & singulis venerabilibus fratribus Patriarchis, Archiepiscopis, Episcopis, ac dilectis filiis

Iudices
qui assi-
stant.

filijs Abbatibus, Prioribus, & alijs per-
 sonis in dignitate ecclesiastica constitutis, per
 Apostolica scripta mandamus, quatenus ipsi,
 & eorum quilibet per se, vel alium, seu alios
 præfatis Præposito, & Societati in præmis-
 sis, efficacis defensionis præsidio assistentes,
 faciant auctoritate nostra singulas prædictas,
 & præsentis litteras plenum effectum forti-
 ri, ac ab omnibus inuiolabiliter obseruari: non
 permittentes quemquam contra illarum teno-
 rem quomodolibet indebite molestari: con-
 tradictores quoslibet, & rebelles per censuras
 ecclesiasticas, & alia iuris opportuna reme-
 dia, appellatione postposita, compescendo, ac
 censuras prædictas legitimis super his habend-
 is seruatis processibus, etiam iteratis vicibus
 aggrauando; inuocato etiã ad hoc, si opus fue-
 rit, auxilio brachij secularis. Non obstantibus
 constitutionibus, & ordinationibus Apostoli-
 cis, ac omnibus illis, & singulis, quæ in litte-
 ris prædictis idem prædecessor noster voluit
 non obstare, cæterisque contrarijs quibuscun-
 que, aut si aliquibus cõmuniter, vel diuissim ab
 Apostolica sit sede indultũ, quod interdicti, su-
 spendi, vel excõmunicari non possint per litte-
 ras Apostolicas, non facientes plenã, & expres-
 sã, ac de verbo ad verbũ, de indulto huiusmo-
 di mentionẽ. Nulli ergo omnino hominum li-
 ceat, hanc paginam nostræ absolutionis, su-
 scepcionis, approbationis, cõfirmationis, adie-

Non obstan-
 tibus, &c.

tionis, suppletionis, decreti, declarationis,
& mandati infringere, vel ei ausu temerario
contraire. Si quis autem hoc attentare præsu-
pserit, indignationem omnipotentis Dei, ac
beatorum Petri, & Pauli Apostolorum eius,
se noverit incursum.

Datum Romæ, apud sanctum Petrum, An-
no incarnationis Dominicæ. M. D. L. Duo-
decimo Kalen. Augusti Pontificatus nostri
Anno Primo.

F. de Mendoza.

Fed. Cardinalis Cæsius.

C O N F I R M A T I O

Et extensio Priuilegij Societatis

IESV contra Apostatas.

M. D. LXV.



P I V S E P I S C O P V S

*seruus seruorum Dei, Ad perpetuam
rei memoriam.*

E Q V V M reputamus, & rationi consonum, vt ea, quæ de Romani Pontificis gratia præcesserunt, licet eius superueniente obitu, litteræ Apostolicæ super illis confectæ non fuerint, suum consequantur effectum. Dudum siquidem felix recorda. Pio Papæ IIII. prædecessori nostro, pro parte carissimi in Christo filij nostri, tunc sui, Sebastiani Portugalliæ, & Algarbiorum Regis illustris, ac dilectorum filiorum Præpositi Generalis, & Religiosorum Societatis IESV, exposito, quod licet aliàs piæ memoriæ Paulus Papa Tertius etiam prædecessor noster, in sui, dictæque Societatis fauorem inhibuisset, nequis post emissâ vota in dicta Societate secundum illius constitutiones, siue Professus, siue Scholaris, siue Coadiutor So-

Concessio
Pauli III.
contra Apo-
statas Socie-
tatis.

P. II. V. cietatis huiusmodi ille esset, ad quemuis aliā ordinem, etiam per sedem Apostolicam approbatum (ordine Carthusiensium dumtaxat excepto) nisi de expressa ipsius Præpositi, aut sedis licentia transferri posset. Volens, & concedens quod Generalis, & alij inferiores Præpositi dictæ Societatis, per se, vel per alios, sic egressos, ac alios quoscunque dictæ Societatis Apostatas, in quocunque habitu illos contingeret inueniri, excommunicare, capere, & incarcerare, aut alias suæ disciplinæ submittere; & ad id, si opus foret, auxilium brachij sæcularis inuocare, liberè & licitè valerent, prout in ipsius Pauli prædecessoris litteris desuper confectis plenius dicebatur contineri: ac inhibitiō, voluntas, & concessio Pauli prædecessoris huiusmodi, quæ tranquillitatē, conseruationem, & commune bonum dictæ Societatis concernebant, ab omnibus illius Religiosis humiliter seruari debuissent: nihilominus nonnulli animi leuitate, vt credebatur ducti, ac quietem labori, cui proculdubio Religiosi Societatis huiusmodi, pro excolenda, & propaganda Christiana Religione continuo erant expositi, ac priuatum commodū, publicæ, tam dictæ Societatis, quam Christianæ reipub. vtilitati indiscrete præferētes, fucatisque coloribus asserentes se id facere ob frugem melioris vitæ, aut strictioris obseruantia, seu non obtenta Superiorum licentia, ad alios,

Quibus de
causis e So-
cietate nō-
nulli ad re-
ligionē aliā
transire vo-
luerint.

alios, etiam fratrum Mendicantium ordines
transire posse iactabant, & forsitan aliqui de
facto iam transierant. Alij vero (quod tur-
pius erat) ambitiosa cupiditate moti, post-
quam se Deo dediderant, sæculi libertatem
quærentes, ad illud reuerſi, & in illo palam
degere non dubitauerunt, nec dubitant, in
animarum suarum detrimentum, ac Societa-
tis prædictæ non modicum præiudicium, &
iacturam. Et nisi opportuno aliquo reme-
dio, dictæ Societatis indemnitati, tranquilli-
tati, & conseruationi consulereſetur, veren-
dum erat, ne Societas ipsa (quæ in erudien-
dis, & docendis viris, qui Christianæ Reipub.
per verbi Dei prædicationem prodeſſent, &
catholicam fidem in remotissimis etiam Bra-
siliæ partibus propagarent & seminarent, se-
dulò intendebat) taliter delusa, & defraudata
viris, sua impensa & labore edoctis, careret
litteratis, qui operam in vinea Domini, iuxta
ipsius Societatis instituta, moremque, præsta-
ri, & exerceri solitam, valerent adimplere. Id-
circo pro parte tam Sebastiani Regis, se &
Religiosorum Societatis huiusmodi opera &
doctrina plurimum vti aſſerentis, quam Pre-
positi Generalis, ac Religiosorum præfato-
rum, eidem Pio prædeceſſori humiliter sup-
plicato, quatenus ipsius Societatis quieti, &
conseruationi prospicere, ac alias in præmil-
ſis opportune providere de benignitate Apo-

Societas hæc
debet care-
re viris, sua
impensa &
labore edo-
ctis.

PII V. stolica dignaretur; præfatus Pius prædeceffor, qui votis illis, quæ dictæ Religionis profectum concernebant, Catholicis Regibus præfertim instantibus, gratum præbere solebat assensum, eosdem Sebastianum Regem, ac Præpositum, & vtrumque eorum, à quibusvis excommunicationis, suspensionis, & interdicti, alijsque ecclesiasticis sententijs; censuris, & poenis, à iure vel ab homine quavis occasione, vel causa latis, si quibus quomodolibet innodati existerent, ad effectum infrascriptorum dumtaxat consequendum; absoluens, & absolutos fore censens: necnon veriores litterarum Pauli prædecefforis, ac Constitutionum Societatis prædictarum tenores, nec non modum, formam, & qualitates votorum, in ipsa Societate, tam per Professos, quam Coadiutores, & Scholares suos huiusmodi emitti solitorum, pro expressis habens; huiusmodi supplicationibus incli-

Nullus post
emissa vota
etiam cuius
vis indulti
prætextu,
potest a So-
cietate exi-
re, absque li-
centia ob-
tentâ a suo
Superiore.

Pontificatus sui anno sexto; quod nullus dictæ Societatis religiosus in litteris Pauli prædecefforis huiusmodi expressus, post emissa vota secundum illius Constitutiones, siue Professus, siue Scholaris, siue Coadiutor, cuiuscunque status, gradus, ordinis, vel conditionis ille foret, à dicta Societate exire, aut recedere, etiam prætextu cuiusvis indul-

mano

mano Pontifice pro tempore existente, seu illius maiore Pœnitentiariorum, aut aliquo Nuntio, vel Legato; etiam de latere impetrati, vel impetrandi (quod etiam ex tunc surreptitium idem Pius prædecessor declaravit) absque expressâ Superioris sui licentia ad id ab eo specialiter obtenta, etiam quæsito colore ob frugem melioris vitæ, aut strictioris observantiæ, ad quemvis alium, etiam Minorum, vel aliorum fratrum Mendicantium, aut Cisterciensium, vel Sancti Benedicti, aut aliorum Monachorum ordinem transire, vel etiam per Superiores ordinum huiusmodi suorumvè Monasteriorum (præfato ordine Carthusiensem dumtaxat excepto) recipi seu admitti posset seu præsumeret, sub pœna excommunicationis tam per recipientes, quam receptos, ac recedentes præfatos, ipso facto incurrenda, & quam idem Pius prædecessor ex tunc contra quemlibet transgressorem quomodolibet in præmissis protulit: & à qua sic inmodatus, præterquam in mortis articulo, ab alio quam à Romano Pontifice, vel superiore Societatis huiusmodi, absolui non posset. Quodque nihilominus secus facta non tenerent, & nullius essent efficacix vel momenti. & insuper, ut qui pro tempore ab ipsa Societate ad Carthusiensem præfatum, vel de Superioris licentia, ad alium ordinem transire vellent, ad

P. II. V.

Nullus de Societate potest transire ad aliū ordinē præter Carthusiensem sine licentia sui superioris.

Transiētes ad aliū ordinē, ut præfertur & qui eos recipiūt ac alias qui recedunt a Societate, sint ipso facto excommunicati, nec possunt absolui nisi a Papa, aut a superiore Societatis.

Recedentes a Societate infra quod tēpus Carthusiensem, vel aliū ordinē tenentur ingredi, & sub qua pœna: quæ etiā incur-

PII V. Carthusiensium videlicet, infra tres menses, runt illos à die quo ab ipsa Societate recessissent, ad recipiētes, alium vero ordinem infra tempus eis a dicto Superiore præfigendum accedere, illosque actualiter ingredi; & , si in illis permanere nollent, aut non possent, absque vlla mora ad dictam Societatem regredi tenerentur, sub pœna excommunicationis præfata, quam tam ipsi Religiosi, quam illos recipientes, vel eis auxilium, consilium, vel fauorem præstantes, etiam incurrerent. Et nihilominus si quis ex Religiosis præfatis, animo indurato aliquid in contrarium attentare præsumeret, vel à dicta Societate, post in ea emissæ vota, vt præfertur, absque Superioris licentia exiret, & in sæculo, vel alio etiam Regulari loco degere præsumeret: liceret dicto Generali, alijsque dictæ Societatis Præpositis, & Superioribus, eosdem transgressores, & exeuntes, tanquam Apostatas, etiam per auxilij sæcularis brachij inuocationem, summarie, & sine figura iudicij, ad dictam Societatem reuocare, capere, & incarcerare, ac debitæ pœnitentiæ subijcere; auctoritate Apostolica perpetuò statuit, ordinauit, præcepit, atque mandauit. Ac insuper eidem Societati, illiusque Generali, ac alijs Præpositis, & singularibus personis, quod omnibus, & singulis priuilegijs, libertatibus, immunitatibus, fauoribus, gratijs, & indultis per quoscunque Ro-

Superiori-
bus Societa-
tis datur fa-
uoritas pro-
cedendi con-
tra dictos
Apostatas.

Communi-
cantur So-
cietati om-
nia Priuile-
gia proce-
dendi cōtra
dictos Apo-
statas.

que Romanos Pontifices prædecessores suos singulorum Mendicantium fratrum ordinibus, illorumque Superioribus, & fratribus, in genere, vel in specie, etiam super suis Religiosis alterutrum non recipiendis, quomodolibet concessis, & approbatis, ac quibus illi utebantur, potiebantur, & gaudebant; uti, potiri & gaudere, liberè & licitè valeant, eadem auctoritate concessit, & indulgit. Et sic in præmissis omnibus, & singulis per quosunque Iudices, & Commissarios quavis auctoritate fungentes, sublata eis, & eorum cuilibet quavis aliter iudicandi, & interpretandi facultate & auctoritate, iudicari, & definiri debere. Ac quicquid secus super his à quoquam quavis auctoritate, scienter, vel ignoranter attentari contingeret, irritum & inane decrevit.

NON obstantibus præmissis ac recolendæ memoriae Innocentij Papæ III. similiter prædecessoris nostri, quæ incipit, Licet, & alijs quibusvis constitutionibus, & Ordinationibus Apostolicis; necnon ordinum prædictorum, & alijs, etiam iuramento, confirmatione Apostolica, vel quavis firmitate alia roboratis, statutis, & consuetudinibus, privilegijs quoque, indultis, & litteris Apostolicis, etiam Mendicantium, & alijs quibusvis ordinibus, eorumque Superioribus, & personis, sub quibuscunque tenoribus, & formis,

Non obstantibus, &c.

PII V. ac cum quibusvis etiam derogatoriis, derogatorijs, alijsque efficacioribus, & insolitis clausulis, irritantibusque, & alijs decretis quomodolibet concessis, confirmatis, & innouatis: quibus omnibus, etiam si de illis, eorumque totis tenoribus, specialis, specifica, expressa, & indiuidua, non autem per clausulas generales, idem importantes, mentio seu quævis expressio habenda, aut aliqua alia, exquisita forma ad id seruanda foret, idem Pius prædecessor, illorum omnium tenores pro sufficienter expressis habens, illis alias in suo robore permansuris, ea vice dumtaxat specialiter & expresse derogauit, cæterisque, contrarijs quibuscunque. Ne autem de absolute, statuto, ordinatione, inhibitione, præcepto, mandato, indulto, concessione, decreto, & derogatione præfatis pro eo quod super illis, ipsius Pij prædecessoris eius superueniente obitu, litteræ confectæ non fuerunt, valeat quomodolibet hæsitari, ipsique Sebastianus Rex, ac Præpositus, & Societas huiusmodi illorum frustrentur effectu, volumus, & similiter dicta Apostolica auctoritate decernimus; quod statutum, ordinatio, inhibio, præceptum, mandatum, indultum, concessio, decretum, & derogatio Pij prædecessoris huiusmodi, perinde à dicto die sexto Kalendas Decembris, suum sortiantur effectum, ac si super illis ipsius Pij præ-

Hæc Pij cōtra Apostolice concessio a die vigesima sexta Nouem. Anno 1565 sortitur suū effectum.

prædecessoris litteræ sub eiusdem diei Datum confectæ fuissent, prout superius enarratur; quodque præsentès litteræ, ad probandum plene absolutionem, statutum, ordinationem, inhibitionem, præceptum, mandatum, indultum, concessionem, decretum, & derogationem Pij prædecessoris huiusmodi, ubique sufficiant: nec ad id probationis alterius adminiculum requiratur. Quo circa venerabilibus fratribus nostris Toletan. Et Auinionen. Archiepiscopis, ac Episcopo Leodien. per Apostolica scripta mandamus, quatenus ipsi, vel duo, aut vnus eorum per te, vel alium seu alios, præsentès litteras, & in eis contenta quæcunque, vbi, & quando opus fuerit, ac quoties pro parte Sebastiani Regis, vel Præpositi Generalis Societatis huiusmodi fuerint requisiti, solemniter publicantes, eisque in præmissis efficacis defensionis præsidio assistentes, faciant auctoritate nostra, illos statuto, ordinatione, inhibitione, præcepto, mandato, indulto, concessione, decreto, & derogatione prædictis pacifice frui, & gaudere: non permittentes eos, vel eorum aliquem desuper per quocunque quauis auctoritate fungentes, quomodolibet indebitè molestari, contradictores quoslibet ac inobedientes, & rebelles, per sententias, censuras, & pœnas ecclesiasticas, aliaque opportuna iuris remedia, appella-

Deputatur
Iudices con-
seruatores.

P II V. pellatione postposita, compescendo: necnon legitimis super his habendis seruatis processibus, illos censuras, & poenas prædictas incurrere declarando, easque etiam iteratis vicibus aggrauando, & auxilium brachij sæcularis si opus fuerit, inuocando.

N O N obstantibus Sanctæ memoriæ Bonifacij Papæ VIII. etiam prædecessoris nostri, qua cauetur, ne quis extra suam ciuitatem, vel dioccesim, nisi in certis exceptis casibus, & in illis ultra vnā dietam a fine suæ diocesis ad iudicium euocetur; seu ne Iudices a dicta sede deputati extra ciuitatem, vel dioccesim, in quibus deputati fuerint, contra quoscunque procedere, aut alij, vel alijs vices suas committere præsumant: & de duabus dietis in Concilio generali edita, dummodo quis ultra tres dietas auctoritate præsentium, ad iudicium non trahatur; & alijs Apostolicis constitutionibus contrarijs quibuscunque omnibus supra dictis, aut si aliquibus communiter, vel diuisim, ab eadem sit sede indultum, quod interdicti suspendi, vel excommunicari non possint, per litteras Apostolicas, non facientes plenam, & expressam, ac de verbo ad verbum de indulto huiusmodi mentionem. Nulli ergo omnino hominum liceat hanc paginam nostræ voluntatis, & decreti infringere, vel ei ausu temerario contraire. Si quis autem

hoc

hoc attentare præsumpserit, indignationem omnipotentis Dei, ac beatorum Petri, & Pauli Apostolorum eius, se nouerit incursum.

Datum Romæ apud S. Petrum, Anno Incarnationis Dominicæ, Millesimo Quingentesimo, sexagesimo quinto, sextodecimo Kal. Februarij. Pontificatus nostri Anno primo.

Io. Bapt. Fauchier.

F. de Torres.

C O N S T I T V T I O

De noua instituti Societatis
IESV confirmatione.



GREGORIUS EPISCOPVS

*seruus seruorum Dei, ad perpe-
tuam rei memoriam.*

ASCENDENTE Domino, &
Saluatore nostro in nauiculā,
A ecce motus magnus factus est
in mari: ipse autem à discipulis
rogatus ventis imperauit, &
facta est tranquillitas. quā nos in Petri nauicu-
la collocati, turbinibus excitatis, ab eodem Do-
mino assiduis precibus postulantes, nostram
interca operam, & laborem in frangendis
procellosis fluctibus impendere non desisti-
mus. cumque tanti laboris socios, & validos
remiges diuina nobis prouidentia præparaue-
rit, eorum opera in superandis sæuientis pela-
gi tempestatibus nos maxime subleuat, qui,
pro communi fluctuantium animarum salu-
te propria commoda nihili pendunt, seque
ad omnia discrimina exponunt. in quo cum
aliarum Religionum studia, tum Societatis
Iesu assiduus pro Christo labor, necnon vs-
que

que ad finem perseuerantia promptā se ostendit; cumque prolem catholicæ Religionis valde proficuum, & ad omnia pericula pro vniuersali Ecclesia subeunda paratam procreauerit, aliam, atque aliam à prima non degenerem præstante gratia Dei quotidie substituit, vt nobis eorum alumni per multiplices probationum gradus altius prouecti, semper præsto sint; quos in rebus arduis suscipiendis fructuosos operarios ascribamus: eos autem vt firmiorem nobis opem ad prædicta nauare possint, ab omni non modo iniuria, sed etiam calumnia studemus intactos conseruare. Quod vt à nobis efficiatur, ipsius instituta tamquam fundamenta eius præsidij, quod catholicæ Religionis impendunt, immota, atque inconcussa, aliorum etiam Romanorum Pontificum exemplo debemus Apostolicæ auctoritate tueri, quorum fel. rec. Paulus III. & Iulius etiam III. Constitutiones, & laudabile dictæ Societatis institutum confirmarunt; Paulusque idem eam ipsam ab omni quorumcunque ordinariarum iurisdictione exemiit: quo instituto per Paulum III. examinato, & à Synodo Tridentina commendato, Pius V. item prædecessor noster Societatem ipsam ordinem esse mendicantem declarauit. Quæ omnia non immerito ab eis sunt concessa ob egregias virtutes, & dona Societati antedictæ diuinitus elargita; cuius

GREG.
XIII.

Societatis
cōfirmatio-
nes aliæ.

Exemptio
Societatis.

Societas
mendicans
declarata.

Finis.

pre-

GREG.
XIII.

Media,

Longa pro
batio,

etiam

etiam

præcipuus finis catholicę est Religionis dese-
lio ac propagatio, animarumque in christia-
na vita, & doctrina profectus: gratiæ quoque
eius vocationis est proprium, diuersa orbis
terrarum loca ex Romani Pontificis, seu Præ-
positi Generalis eiusdē Societatis directione
peragraré, vitamque in quauis mundi parte,
agere, vbi saluandarum sua opera animarum
copiosior prouentus ad Dei gloriam speretur.
Ad quem finem Spiritus sanctus bo. me.
Ignatii Loyolæ Societatis ipsius Institutoris,
eiusque lociorum excitator, media quoque,
prædicationum, ac cuiuscunque ministerij
verbi Dei, doctrinæque Christianæ, & spiri-
tualium exercitiorum, aliorum item carita-
tis operum, & Sacramentorum administra-
tionis, ac præcipue Pœnitentiæ, & Euchari-
stia, horumque frequentioris vsus accommoda-
uit. Ad quæ iussu, & pro dignitate præ-
standa, difficultates superandas, periculaque
adeunda, quibus dictæ Societatis religiosi in
huiusmodi discursionibus, & ministerijs ex-
ponuntur; necesse est, vt ipsi talia obituri, ma-
gno virtutis, & deuotionis præsidio munian-
tur: quod illis gratia in primis omnipotentis
Dei, simulque educatio ipsa, longa item in So-
cietate probatio, nec non regularum, & Con-
stitutionum obseruantia præstare noscuntur.
Quibus Constitutionibus, vt tantę ponant ru-
dimenta virtutis, ad quam aluntur, statutum
est,

est, vt Nouitij in Societate biennio probentur, quo explēto, si ipsi perseuerare voluerint, & Societati fuerit ab eis satisfactum (quoniam Societas ipsa non sōlis Nouitijs, & Professis, vt reliqui regulares ordines, constat) tria substantialia vota simplicia (nisi quis interdum ad professionem, vel gradum Coadiutorum, forinātorum admittendus videretur) Paupertatis, Castitatis, & Obedientiæ in eadem Societate ex Apostolico indulto, ac iuxta vouendi formulam in eisdem Constitutionibus expressam emittunt, ac secundum illas promittunt se eandem Societatem ingressuros, hoc est, vltiorem aliquem illius gradum, prout Præposito videbitur Generali. Quibus votis emissis Nouitij esse desinunt, & in Societatis corpus, qui litteris operam dederint, vel dari sunt, vt Scholares approbati: alij vero vt Coadiutores temporales nondum formati cooptantur, ac quantum est ex parte ipsorum perpetuo, ex parte vero Societatis iuxta Apostolica indulta, & Constitutiones prædictas tandiū obligati sunt, quandiū Præpositus Generalis eos in Societate retinendos esse censuerit. Quod ad Societatis conseruationem maxime est necessarium, idque ab illius exordio prouisum, & post experimento comprobatum est, idque initio ingressus illis explicite manifestatur, atque ipsi conditionem hanc amplectuntur, quæ eis (si quos dimittere oporteat)

C multo

GREG.

XIII

Nouitij biennio probantur.

Tria substantialia vota simplicia.

Scholares approbati. Coadiutores temporales.

GREG.
XIII.

Coadiuto-
rum tempo-
ralium for-
matorum tria
substantia-
lia vota pu-
blica, & in
manibus sed
simplicia.

Tertius pro-
bationis an-
nus.

multo est commo dior, vt liberi potius, quam votis obligati dimittantur, alijque iustis, & rationabilibus de causis. Coadiutores temporales non formati, qui non ad studia litterarum, sed ad domestica munia curanda destinantur, post aliquot annos, quibus Generali Præposito, & Societati satisfecerint, per tria item Paupertatis, Castitatis, & Obedientiæ vota licet publica, & in manibus Superioris emissa, non tamen solemnia, sed tum ex Constitutionum præscripto, tum ex vouentis, & admittentis intentione simplicia existunt, in Coadiutorum temporalium formatorum gradum admittuntur. Scholares vero studijs in Societate absolutis, antequam professi, v'el Coadiutores spirituales formati fiant, non solum tertium adhuc vltioris probationis annum, in deuotionis & humilitatis exercitijs impendunt (vt si qua fortasse in re harum virtutum feruor per litterarum occupationem intepuerit, per earundem virtutum frequentiore exercitationem, ardentiorque Diuini auxilij inuocationem recalescat) sed etiã in verbi Dei, sacrarum & scholasticarum lectionum, pœnitentiæque & Eucharistiæ Sacramentorum Societatis ministerijs tandiũ probantur, quandiu Præposito Generali videtur, nec antequam ipsi Præposito sint plane perspecti, eique in omnibus satisfecerint ad huiusmodi gradus promouentur. Qui enim

enim ad professionem quatuor votorum admittendi sunt, eos iuxta Constitutiones eadem, & Apostolica decreta & Indulta, viros omnino humiles ac prudentes in Christo, & in vitæ puritate ac litteris conspicuos, diuturnique ac diligentissimis experimentis probatos, atque Sacerdotes, & in ministerijs huiusmodi prius, diu multumque versatos vocatio hæc requirit, vtpote quos ardua maneant ministeria. Quo fit vt non omnes ad eandem professionem idonei esse, nec tales sine longa exercitatione atque experimento fieri, aut etiam cognosci possint. Quapropter Societatis corpus in sua membra & gradus, idem Ignatius diuino instinctu ita duxit disponendum, vt præter eos, quos Præpositus Generalis ad professionem quatuor votorum idoneos esse censuerit, & nonnullos, quos interdum ad professionem trium admittere potest; reliqui etiam Sacerdotes, quorum vita & doctrina in Societate diu probata esset, ac Præposito Generali perspecta, & de ipsius licentia in Coadiutorum spiritualium formatorum gradum, per tria illa vota similiter publica, sed simplicia in superioris manibus emissa, admitterentur. Quibus emissis tam hi qui spirituales, quam qui temporales Coadiutores formati fuerint, certum in Societate gradum habent; suntque omnis hæreditariæ successionis incapaces, nihilque omnino proprii iuxta

GREG.

XIII.

Quam ad
professionem
quatuor vo-
torum ad-
mittendi.

Professio
votorum.

Coadiuto-
res spiritua-
les formati.

Coadiuto-
rum formato-
rum certus
in Societa-
te gradus &
paupertas.

GREG. XIII. Constitutiones easdem habere possunt. Nec propter emissā huiusmodi vota publica, aut per mortem ab intestato, in illorum sicut nec in Professorum bonis, Domus vlla, aut Ecclesia, vel Collegium dictæ Societatis succedere potest. Qui vero quatuor votorum Professuri sunt, ij tribus illis solemnibus substantialibus votis quartum similiter solemne addunt, specialis Summo Pontifici obedientiæ circa missiones præstandæ, ob certiores Spiritus sancti in missionibus ipsis directionem, ac maiorem ipsorum mittendorum Sedi Apostolicæ Obedientiam, maioremque deuotionem, humilitatē, mortificationem, ac voluntatum abnegationem. Post emissam vero professionem siue quatuor, siue trium votorum, Professus ad Paupertatis, quæ regularis instituti murus est & propugnaculum, perfectiorem tuendam, omnemque ambitionis occasionem excludendam; nonnulla alia simplicia vota emittunt quibus promittunt se nunquam quacunque ratione acturos vel consensuros, vt quæ in Constitutionibus Societatis circa paupertatem ordinata sunt, immutentur, nisi quando ex iusta rerum exigentium causa paupertas magis restringenda videretur; neque prætenfuros ne indirecte quidem, vt in aliquam prælationem vel dignitatem intra vel extra Societatem eligantur; nec extra Societatem in sui electionem quantum

in eis

in eis fuerit, cōsensuros, nisi coactos obediētia eius qui id ip̄is possit sub pœna peccati præcipere; item Societati vel eius Præposito manifestaturos, si quem sciant aliquid huiusmodi moliri. Porro non solum Professi, & Coadiutores formati, sed ex alijs quicunque absoluto probationis biennio prædicta tria substantialia vota etiam simplicia emiserint, si abique expressa licentia à Societate discedant, etiam si prætextu melioris frugis, & transitus ad alium quemcumque ordinem (Cartusiēnium dumtaxat excepto) id faciāt, apostasiæ, & excommunicationis ex Apostolicę sedis decreto pœnas incurrunt, à quibus non nisi à Summo Pontifice, vel à Generali absolui possunt. Inique enim cum Societate ipsa ageretur, si viris multo labore ad ardua ministeria eruditis, cum religionis catholicę & huius sedis detrimento priuaretur, præsertim cum Societatis Constitutiones, & priuilegia, quę supradicta continent, in separata, antequam ad Nouitiorum conuictum admittantur, habitatione, eis maturius consideranda tradantur. Biennio Nouitiatus completo, & emissis votis simplicibus, vna est omnibus omnino viuendi, & obediendi ratio; debent enim omnes in omnibus obedire, & in communi viuere non secus alij, atque ipsi Professi & Coadiutores formati, idque in Domibus quidem Probationum & Collegijs ex reddi-

GREG.

XIII.

Qui emissis votis etiam simplicibus sine licentia discedunt, apostasiæ, & excommunicationis pœnas incurrunt.

Pœnæ referuatæ.

Omnibus vna est viuendi, & obediendi ratio.

Domus Probationum. Collegia.

GREG.
XIII.
 Domus Pro
 fessorum.

Promissio
 distribuendi
 bona in pau
 peres.

Qui exple
 ro biennio
 Novitiatus
 tria substan
 tialia Socie
 tatis vota,
 simplicia e
 miserint, ve
 re & prop
 rie religio
 si existunt.
 Si a Socie
 tate defici
 ant, excom
 municationis & alijs
 apostatarum
 pœnis subi
 acant.

tibus, in Domibus vero Professorum, quę nul
 los omnino redditus habere possunt, ex elec
 mosynis tantum. Et licet qui ad gradus Pro
 fessorum, & Coadiutorum formatorum
 nondum peruenerunt, bonorum suorum ius
 atque dominium tum alias ob iustas causas,
 tum etiam vt maiorem Societas habeat li
 bertatem illos, si opus fuerit, cum minori of
 fensione dimittendi, ad tempus Generalis
 Præpositi iudicio præscribendum valeant reti
 nere, vt in pauperes tandem, seu alios pios
 vsus pro ipsorum deuotione distribuantiuxta
 Euangelicum consilium, ac promissionem,
 quam initio Nouitiatus faciunt: interim ta
 men quantum ad illorum vsum religiosam
 paupertatem seruant, nec vlla re tanquā pro
 pria, & sine Superioris facultate vti possunt.
 Et quamuis ij omnes, qui post biennium No
 uitiatus dicta tria vota simplicia, vt præ fertur
 emisierint, ac in corpus Societatis cooptati, il
 liusque meritorum, & priuilegiorum non
 secus atque ipsi Professi participes effecti; qui
 que quantum in eis est, & professionem emit
 tere parati, si ipse Præpositus Generalis id
 prædictæ Societatis instituto congruere iudi
 cauerit, & in perpetuum Dei seruitio votis
 simplicibus consecrati, ac sua sorte, prout lau
 dabile Societatis institutum exigit, contenti;
 vere & proprie religiosi existant; & si à So
 cietate deficiant, excommunicationis & alijs

Apo-

Apostatarum pœnis sint subiecti: tamen cum non ita pridem intellexissemus nonnullorum animos, qui p̃ij alioqui & vtilēs operarij existebant, sollicitari interdum & affigi, quasi non essent religiosi, eo quod non essent Professj; nec etiam deesse qui Religionis prætextu, transfigurante se in angelum lucis Satana, non solum ea occasione inquieti existerēt, sed etiam aliorum pacem & vocationem disturbare; eosque in fraudem & defectionem deducere conarentur, vnde fructuosa hæc religio grauissima potuisset accipere detrimenta: Idcirco cum diuina prouidentia pro temporum necessitate, varia & salutaria Ordinū instituta in Ecclesia sua produxerit, nouisque subinde in ea nascentibus morbis, noua remedia; nouisque emergentibus hostium impugnationibus, noua regularium ordinum auxilia excitarit: & cuique illorum, iuxta cuiuslibet peculiaris gratiæ vocationem peculiariter quasdam notas, propria insignia, ac opportuna ad finem quem intendit, media suggererit; & nunc maxime (vt felicissimi toto orbe successus testantur) mirificos in agro Dominico fructus prædicto Societatis Iesu instituto proferat: quæ Societas (quemadmodum & alia nascentium regularium ordinum exordia) à spiritu contradictionis impugnatur: cumque ipsi Ordines Romanorum Pontificum propterea constitutionibus circummu-

- Dat. 1571.
- 1571.
- 1571.
- 1571.
- 1571.

- 1571.
- 1571.
- 1571.
- 1571.
- 1571.
Societatis
exordia im
pugnata, vt
& aliorum
ordinum.

GREG.
XIII.

Alia insti-
tuti decla-
ratio & con-
firmatio re-
feratur.

Nova insti-
tuti ac præ-
missorū om-
nium, Con-
stitutionū-
que & Pri-
uilegiarum
Societatis
confirmatio.

niri consueuerint, cuius rei sanctorum Domini, & Francisci præclarissimi Ordines exempla abunde suppeditarunt; ita nos licet alias institutum prædictum, priuilegia & Constitutiones ipsius Societatis confirmauerimus, & declarauerimus, motu proprio statuentes eos, qui biennio Nouitiatus peracto, tria vota, tametsi simplicia emisissent, esse verè, & proprie Religiosos; cum præcepto, ne quis hæc in dubium reuocare audeat, ac cum irritante, & aliis decretis, prout in nostris super hoc confectis litteris plenius continetur. Nos vniuersalis Ecclesiæ vtilitati, quam ex inuoluto, & inconcusso dictæ Societatis instituto, & religiosæ sobolis educatione sentimus, & maiorem in dies speramus, prospicientes; & propterea eiusdem Societatis indēnitati, paci, quieti, & incremento consulere volentes, Motu simili, & ex certa scientia nostra, deque Apostolicæ potestatis plenitudine laudabile ipsius Societatis institutum, & quæ illud concernunt præmissa omnia, & singula prædictaque illius ac quæcunque alia priuilegia, facultates, exemptiones, immunitates, gratias, & indulta, à prædictis prædecessoribus nostris, & à nobis etiam per communicationem concessa, Constitutiones quoque, ac statuta, & decreta qualiacunque, ac si ad verbum præsentibus infererentur pro expressis habentes, tenore præsentium approbamus, &

con-

confirmamus, suppletes omnes Iuris, & facti defectus, si qui interuenerint in prædictis Constitutionibus, & statutis. Ad hæc dictam Societatem firmo sedis huius præsidio communire volentes, hac nostra perpetua Constitutione, motu, scientia, & potestatis plenitudine, similibus statuimus atque decernimus, tria vota huiusmodi, & si simplicia, ex huius sedis institutione, ac nostra etiam declaratione, & confirmatione esse vere substantialia. Religionis vota, ac in dicta Societate tanquam in Religione approbata per sedem eandem admissa fuisse, & esse, ac per nos admitti, nec in illis a quocquam præter nos, & sedem huiusmodi dispensari, nec ea ullo alto modo, quam per legitimam dimissionem à Societate cessare posse; & non modo eos, qui in Coadiutorum, formatorum, siue spiritualium, siue temporalium gradus, & ministeria, ut præfertur, admittuntur, sed & Scholares ipsos, ac supradictos alios omnes, & quoscunque, qui in ipsam Societatem admissi, biennio probationis à quolibet eorum peracto, tria vota substantialia prædicta, tametsi simplicia, emiserint, aut emittent in futurum, vere & proprie religiosos fuisse, & esse, ac fore, & ubique semper & ab omnibus censeri & nominari debere, non secus atque ipsos, tum Societatis, tum quorumuis aliorum Regularium ordinum Professos, suisque Præpositis in omnibus,

GREG.
XIII.

Huiusmodi
tria vota, &
si simplicia,
vere tamen
sunt. Reli-
gionis sub-
stantialia
vota.

Huiusmodi
vota, & si
simplicia,
emittentes,
vere & pro-
prie sunt re-
ligiosi.
Nova exem-
ptio.

**GREG.
XIII.**

nibus, & per omnia obedire, & huic sedi immediate subiectos, & a quorumvis ordinari-
 orum, & delegatorum, seu aliorum iudic-
 um iurisdictione omnino exemptos, prout
 nos etiam vigore presentium eximimus; de-
 nique ut omnium Societatis privilegiorum
 iuxta Generalis Præpositi dispositionem sunt
 participes, ita quoque excommunicationis
 maioris latę sententię, & alijs Apostatarum
 pœnis, si qui à Societate deficiant, iubiacerē,
 ac tamquam veros Apostatas puniri posse,
 nec a quoquam, nisi per nos, & sedem prædi-
 ctam, aut Generalem Præpositum ab eisdem
 pœnis absolui, nec ante huiusmodi absolutio-
 nem, & a Societate dimissionem matrimo-
 nium contrahere, quinimmo eos omnes ad
 contrahendum inhabiles, ac contractus hu-
 iusmodi nullos, & irritos esse, prout irritos fa-
 cimus, & annullamus. Et ut contradicentium
 audacia coerceatur, præmissas omnes, & quas-
 vis alias illis similes assertiones contra dictę
 Societatis institutum, vel quomodolibet in
 illius præiudicium pronuntiatas, aut scriptas,
 falsas omnino, & temerarias esse, & ceteri
 debere. Præcipimus igitur in virtute sanctę
 obedientię, ac sub pœnis excommunicationis
 latę sententię, necnon inhabilitatis ad que-
 vis officia, & beneficia sæcularia, & quorum-
 vis Ordinum regularia, eo ipsa absque alia
 declaratione incurrendis, quarum absolutio-
 nem

**Pœnæ apo-
 statarum in
 novantur.**

**Earundem
 pœnarū ab-
 solutio de
 nouo refer-
 watur.**

**Nouum ma-
 trimonij in-
 pedimentū
 dirimens.**

**Præcipitur
 sub excom-
 municatio-
 nis, & inha-
 bilitatis pœ-
 nis eo ipso
 incurrendis
 ne quis au-**

nem nobis, & successoribus nostris reseruamus, ne quis cuiuscunque status, gradus, & præminentie existat, dictæ Societatis institutum, Constitutiones, vel etiam præsentis, aut quemvis earum, vel supradictorum omnium articulum, vel aliud quid supradicta concernens quouis disputandi, vel etiam veritatis indagandæ quæsito colore directe vel indirecte impugnare, vel eis contradicere audeat: districtius inhibentes ne quis siue extra, siue intra dictam Societatem, nisi de illius Generalis, aut inferiorum Præpositorum licentia, notationes, declarationes, glossas, vel scholia vlla super præmissis facere, vel ea nisi quantum verba ipsa sonant interpretari, aut de eis disceptare, seu scrupulum cuiquam iniicere, vel in controuersiam aut dubium reuocare audeat quoquomodo; nec glossas, aut interpretationes siue impressas, seu scriptas ad id pertinentes legere, docere, alijque tradere, vendere, vel apud se retinere præsumat: si quid vero dubij de eisdem oriri contigerit, ad sedem prædictam, vel ad Generalem Præpositum dictæ Societatis, aut ad eos quibus id ipse commiserit, referatur. Sicque in præmissis omnibus & singulis per quoscunque Iudices & Commissarios etiam causarum Palatii Apostolici auditores, ac S. R. E. Cardinales in quauis causa, & instantia, sublata eis & eorum cuilibet quauis aliter iudicandi & interpre-

GREG.

XIII.

deat Societatis institutum & cetera impugnare. Nec nisi de Præpositorum licentia interpretari. Nec in controuersiam reuocare. Nec glossas legere, docere, alijs tradere, vel apud se retinere.

tandi

GREG.

XIII.

Sic iudicari
debere.Mandatur
omnibus or-
dinarijs, vt
præfentes
litteras ob-
feruari fa-
ciant.

tandi facultate, & auctoritate, iudicari, & de-
finiri debere; necnō irritū, & inane quidquid
secus super his a quocūque quauis auctoritate
scienter, vel ignoranter contigerit attentari.
Mandantes vniuersis, & singulis Patriarchis,
Archiepiscopis, Episcopis, & cæteris Ecclesia-
rum & locorum etiam Regularium Præla-
tis, per vniuersum orbē constitutis, vt præsen-
tes litteras in suis quilibet Ecclesijs, Prouincijs,
Ciuitatibus, diocesis & iurisdictionibus ab
omnibus inuiolatē obseruari: quin etiam Præ-
positum ac personas Societatis huiusmodi de-
fendant, eoque præmissis omnibus & singu-
lis pacifice frui faciant, & gaudere, non per-
mittentes ipsos per quoscūque quomodolibet
molestari; contradictores per Censuras
Ecclesiasticas, & alia Iuris & facti remedia
opportuna, appellatione postposita, compe-
scendo; Inuocato etiam ad hoc, si opus fuerit
auxilio brachij secularis. Non obstantibus re-
col. mem. Bonifacij Papæ viij. quæ incipit;
Quod votum, & alijs Apostolicis constitu-
tionibus, ac etiam aliorum ordinum, iuramen-
to, confirmatione Apostolica, vel quauis fir-
mitate alia roboratis statutis, & consuetudi-
nibus; priuilegijs quoque, Indultis, & litteris
Apostolicis quibuscūque huiusmodi ordini-
bus, Vniuersitatibus, locis vel personis per
quoscūque Romanos Pontifices prædeces-
sores nostros, ac nos, & sedem prædictam

Nō obstan-
tibus.

etiam

etiam motu proprio & ex certa scientia, ac de GREG.
XIII.
 Apostolicæ potestatis plenitudine, & cum
 quibuscumque irritatiuis, annullatiuis, cassatiuis,
 reuocatiuis, modificatiuis, præseruatiuis, ex-
 ceptiuis, declaratiuis, mentis attestatiuis, ac
 derogatoriis derogatorijs, alijsque effica-
 cioribus, & inuolitis clausulis, irritantibusque
 & alijs decretis in genere, vel in specie, ac
 alias quomodolibet etiam pluries concessis,
 confirmatis, & innouatis. Quibus omnibus &
 singulis etiam si in eis caueatur expressè, quod
 illis nullatenus, aut non nisi sub certis modo,
 & forma in illis expressis derogari possit, pro
 illorum sufficenti derogatione de illis, eorum-
 que totis tenoribus specialis, specifica, & ex-
 pressa mentio habenda, seu aliqua alia exqui-
 sita forma ad hoc seruanda foret, tenores hu-
 iusmodi præsentibus pro sufficienter expressis
 habentes, illis alias in suo robore perman-
 ris, hac vice dumtaxat specialiter, & expressè
 derogamus: Contrarijs quibuscunque, aut
 si aliquibus communiter vel diuim ab ea-
 dem sit sede indultum, quod interdicti, suspen-
 di, vel excommunicari non possint per litte-
 ras Apostolicas non facientes plenam, & ex-
 pressam, ac de verbo ad verbum de indulto
 huiusmodi mentionem. Præsentis autem
 Constitutionis & gratiæ communicationem
 omnibus alijs, qui sua priuilegia cum ipsa So-
 cietate copiose participant, participareque
 pote-

Præsentis cō-
 cessio non
 communi-
 catur.

GREG.
XIII.

Trāsumptis,
habeatur si
des.

poterunt quomodolibet in futurum, fieri omnino prohibemus. Ceterum volumus, vt præsentium transumptis etiam impressis, manu Secretarij dictæ Societatis, vel Notarij publici subscriptis, & sigillo Præpositi Generalis eiusdem Societatis, vel alterius personę in dignitate Ecclesiastica constitutę munitis, eadem omnino fides habeatur in iudicio, & extra illud, quæ litteris ipsis originalibus haberetur, si essent exhibitę vel ostensę. Nulli ergo omnino hominum liceat hanc paginam nostrę approbationis, confirmationis, supplementationis, decretorum, statuti, præcepti, interdicti, derogationis, & voluntatis infringere, vel ei ausu temerario contraire: si quis autem hoc attentare præsumpserit, indignationem omnipotentis Dei, ac Beatorum Petri & Pauli Apostolorum eius se nouerit incursum.

Datum Romę apud Sanctum Petrum Anno Incarnationis Dominicę 1584 octauo Kal. Iunij anno Pontificatus Nostri tertio decimo.

M. Car. S. Stephani.

Cesar Glorierius.


A. de Alexijs.

Registrata apud Casarem Secretarium.

GRE-

C O N S T I T V T I O

Qua Societatis institutum, & ratio gubernandi confirmantur: & ne quid contra hæc à quoquam tentetur, grauitèr interdicitur.



GREGORIUS EPISCOPVS

seruus seruorum Dei, ad perpetuam rei memoriam.

ECCLESIAE Catholicae, cui Deo auctore præsumus, decor, atque vtilitas postulat, vt cum in omnibus illius mēbris fouendis, atque ornandis assidue nobis laborandum sit: in illa tamen præcipuam vigilantiæ nostræ partem impendere debeamus, quæ non modo ipsa per se, robur, ac pulchritudinem corpori huic mystico afferunt; sed cæteras etiam eiusdem partes vel disruptas consolidare, vel integras custodire, vel fœdatas eluere, atque etiam ornare valeant. Inter hæc autem quem locum obtineant religiosi Ordines, præsertim vero qui proximorum vtilitati deseruiunt, non obscure perspicimus. cum & superiora tempora, & præsentia diligenter attendimus.

In

GREG. XIIII Societas cōmendatur. In his vero Religio Societatis Iesu, quam nouissimis hisce diebus diuina prouidentia excitauit; adeo strenue laborauit, ac sine intermissione laborat, ut illius vel turbationem, & infirmitatem, ad commune Ecclesiæ damnum; vel pacem, atque integritatem, ad eiusdem, utilitatem maxime pertinere putemus. Et quoniam neque tranquillitati, neque firmitati huiusmodi Ordinum prospectū esse poterit, nisi eorum instituta firmiter inconcussa seruentur, iisdemque modis feliciter progrediantur & crescant, quibus a Fundatoribus Domino inspirante, atque hac sancta Sede approbante, primum fundati sunt: necessarium duximus, ea quæ ab Ignatio huius Ordinis Fundatore, ordinata; & a prædecessoribus nostris Romanis Pontificibus circa eiusdem Societatis Institutum sancita sunt, Apostolicæ firmitatis munimine denuo roborare. Quamuis enim præfata Societatis Institutum iam ille ab eius primordijs fuerit per se. re. Paulum. III. & Iulium etiam III. Romanos Pontifices Prædecessores nostros approbatum, & a se. re. Gregorio XIIII. etiam prædecessore nostro, primo per eius qualdam litteras sub Dat. Kal. Februar. Pontificatus eius anno vndecimo, deinde copiosius per Cōstitutionem, quæ incipit, Ascendente Domino, confirmatum: Nihilominus tamen non ideo defuerunt, qui adhuc sub zeli, & boni specie, aliqua ex

ijs,

Regulares
Ordines eis
dem modis
crescere de
bēt, quibus
fundati sūt.

Summorum
Pontificum
instituti So
cietatis ap
probatio
nes.

ijs, quæ in dictis Pontificijs approbationibus, & confirmationibus continentur, & alia etiã, quæ ad Institutum, & rationem gubernandi dictæ Societatis pertinent, varijs modis impugnare. Quin etiã apud piæ mem. Sixtũ Papam V. Prædecessorem item nostrum oblati libellis, & varijs excogitatis modis traducere, & calumniari, atque vt ea quæ consultissimè sancita erant, infringere, conari veriti nõ fuerint; Instantes scilicet, vt res & negotia Societatis non per Superiores, vt hætenus iuxta illius Constitutiones, & Apostolica diplomata factum est, sed per Capitula, seu Congregationes definiantur: Vt electiones tam Provincialium, quam Superiorum localium, non à Præposito Generali iuxta huiusmodi Constitutiones, ac diplomata, sed in Capitulis eisdem fiant: Vt Nouitij in Societatem, & ad vota Scholasticorum peracto biennio Nouitiatu in Capitulis eisdem admittantur: Vt professioni certum ac præfixum tempus statuatur, quo exacto, per suffragia Congregationis Religiosi huiusmodi ad professionem admittantur: Vt qui iuxta Institutum, ac formulam ipsam votorum, qua voverunt, sanctæque huius Sedis approbationem à Societate dimittuntur, non nisi ordinarij iudicij forma seruata dimittantur. Illa etiã in controuersiam, & examen eodem tempore adducta fuere, nempe, Nomen ipsum Societatis Iesu, quod

GREG.
XIII.

Impugnanti-
um inuen-
ta & præsū-
ptiones.

Quædam in-
dubium vo-
cata.

D non

● REG.
XIII.

non esset ita deinceps vocanda : Religiosos non professos non debere ad sacros ordines promoueri: Huiusmodi Religiosos non esse, prohibendos, quin ad alios Regulares Ordines transire: Similiter nec laicos, vt ad Sacerdotium, nec alios non professos, vt ad professionem, aut ad gradus mutationem aspirare, possint: Facultatem præterea eos, qui professi non sunt, dimittendi, non probari. Quibus & huiusmodi alijs nouis impugnantium inuentis si aditus pateret, vniuersa Societatis structura labefactaretur, atque cōuelleretur. Nos igitur huiusmodi impugnationibus diligenter consideratis, & perpenso circa reliqua, quæ in controuersiam, & examen deducta fuerant, nonnullorum Venerabilium Fratrum nostrorum S. R. E. Cardinalium iudicio, qui ex mandato eiusdem Sixti prædecessoris, illa accurate discusserant, & examinauerant: Simul etiam perpendentes, primum quidem quod modus ille res & negocia per Capitula definiendi, optimum Societatis ordinem, ac vniuersam gubernandi rationem, prorsus euerteret; Illam enim Ignatius Fundator quamuis Superiorum consilium, prudentiamque, ac rerum experientiam adiuuare, & promouere curauerit, adhibitis scilicet, tam Generali Præposito, quam singulis alijs Superioribus tum Prouincialibus, tum localibus, suis, ex selectioribus, Consiliarijs, atque Admo-

Ratiogubernandi in Societate.

Admonitoribus, monarchicam tamen, & in definitionibus, vnius Superioris arbitrio contentam esse decreuit. Deinde quod ratio Capitularium electionum maxima ipsi Societati afferret incommoda; In qua, licet electiones quædam primariæ, cuiusmodi sunt Generalis Præpositi, ac illius Assistentium, & Admonitoris in generalibus Congregationibus, in Prouincialibus vero, tam eorum, qui Generalem Præpositum eligere, vel generali ipsi Congregationi cum iure suffragij interesse, quam Procuratorum etiam, qui e singulis prouincijs quolibet triennio in Urbem ad Procuratorum Congregationem mittuntur; & eiusmodi quædam aliæ electiones per secreta scrutinia, & decisiua suffragia fiant: In reliquis nihilominus proprii cuiusque gradus iudiciū, & officiorum discretio ac distributio, iuxta Constitutiones easdem, & Apostolica diplomata, ipsius Instituti confirmatoria prædictorum Pauli III. ac Iulij etiam III. prædecessorum nostrorum, tota est in ipsius Præpositi Generalis manu. Quam Præpositi Generalis, ac reliquorum illi subordinatorum, Superiorum auctoritatem nonnulli impugnatores multis modis contrahere, ac enervare tentarunt. Denique quod in ipsorum dimissionibus, qui iuxta formulam Votorum simplicium in Constitutionibus expressam, vouerunt, quosque in Societate retinere non expe-

GREO.
XIII.

Primariæ
quædā ele-
ctiones in
Congrega-
tione sunt.

Graduū di-
cretio ac
officiorum
distributio
est in manu
Præpositi.

GREG.

XIII.

In simplici
bus Societa
tis votis nec
contractus
vitiose clau
dicat, nec
iniustitia vl
la interce
dit.

Nova insti
tuti, Con
stitutionū,
ac præmis
sorum om
nium & pri
uilegiorum
Societatis
cōfirmatio.

dit, nec contractus vitiose claudicet, nec vlla
alia interueniat iniustitia. Considerantes in
super, quod in regularis disciplinæ, ac spiri
tualis perfectionis non exiguum detrimentū,
totiusque Ordinis perturbationem maximā,
atque perniciem vergeret, si ea quæ à funda
tionibus sancte statuta sunt, atque ab vniuerso
ipso Ordine sæpius in illius generalibus Con
gregationibus recepta, & approbata, & quod
præcipuum est, ab hac Sancta Sede sancita &
confirmata sunt, non solum mutari, sed quo
cunque prætextu impugnari ac labefactari
contingat: Omni nobis studio curandum ef
se duximus, eiusmodi nouitatibus, ac teme
rarijs impugnantium præsumptionibus om
nem aditum præcludere, ac Societatis indem
nitati prospicere; vt hac ratione Societas ip
sa nostro & Apostolicæ Sedis præsidio mu
nita, atque in sui Instituti puritate, & Regu
laris disciplinæ integritate, quiete, ac pace
conseruata, yberiores in dies fructus in agro
Domini pergat, ipso Domino adiuuante, ala
criter, & absque impedimento proferre. Mo
tu igitur proprio, & ex certa scientia nostra,
deque Apostolicæ potestatis plenitudine, lau
dabile ipsius Societatis Institutum, Constitu
tionesque omnes, ac statuta, & decreta, &
quæ illud concernunt præmissa omnia, & sin
gula, prædictaque, ac quæcunque alia eius
priuilegia, facultates, exemptiones, immu
nita-

nitates, gratias & indulta à prædictis, seu etiam ab alijs prædecessoribus nostris, etiam per communicationem concessa, qualiacunque illa, ac si ad verbum præsentibus inserebantur, pro expressis habentes, tenore præsentium approbamus, & confirmamus, supplet omnes iuris ac facti defectus, si qui interuenerunt in eisdem. Et nihilominus hac nostra perpetuo valitura Constitutione, Motu, scientia, & potestatis plenitudine similibus, statuimus, decernimus, & ordinamus, vt in Societatis prædictæ Congregationibus quibuscunque eo prorsus modo procedatur, atque ea tantum tractentur, & definiantur, quæ in Constitutionibus ac Congregationum generalium decretis statutum iam est, vel in posterum statuatur, vt in eisdem Congregationibus tractentur & definiantur. Electio vero Superiorum tam Prouincialium, & Visitatorum, quam quorumcunque localium tota sit penes Præpositum Generalem iuxta Constitutiones easdem, prout penes ipsum esse & conseruari districte præcipimus, cum potestate illorum facultatem reuocandi, restringendi, & etiam augendi, ac administrationis rationem ab illis exigendi, & eosdem ab officio remouendi, prout in Domino iudicauerit expedire. Nouitios etiam tam in eorum admissione ad Societatem, quam ad Scholasticorum vota post biennium Nouitiatus, iuxta Socie-

GREG.
XIII.

In Congregationibus procedatur iuxta constitutiones & decreta.

Superiorum electio tota sit penes Præpositum.

Nouitij ad Societatem & ad scholasticorum vota per Superiores sunt admittendi.

GREG.
XIII.

Graduū di-
cretio, ac
in Coadiu-
toresforma-
tos & Pro-
fessos pro-
motio sit in
manu Præ-
positi.

Tēpus pro-
motionis ad
huiusmodi
gradus non
sit determi-
natum.

Qui nā sint
ad profes-
sionem ad-
mittendi.

Promoueri
nō debent,
nisi cum So-
cietati fue-
rit ab eis
plene satis-
factum.

Omnis au-
ctoritas om-
nesq; facul-
tates Præ-
posito con-
cessæ, inui-
olatæ confer-
rentur.

tatis morem, per Superiores admittendos esse. Graduum etiam discretio & iudicium, ac Coadiutorum tam spiritualium, quam temporalium, simulque & Professorum promotio iuxta huiusmodi Constitutiones similiter sit in manu Præpositi Generalis. Tempus autem promotionis ad huiusmodi gradus, nullo modo volumus certum seu determinatum esse; sed Cōstitutiones, ac diplomata prædicta hæc etiā in parte omnino obseruari volumus, & mandamus, quæ statuunt selectos tantum spiritus & doctinæ viros, & multum diuque exercitatos, ac in varijs probationibus virtutis, & abnegationis sui ipsorum cum omnium ædificatione, & satisfactione, satis cognitos ad professionem esse admittendos; & denique, non nisi cum Societati, vel eius Præposito Generali fuerit ab eis plene in Domino satisfactum. Omnis vero auctoritas, omnes denique facultates per dictę Societatis Constitutiones & Apostolica diplomata Præposito Generali concessæ, tam in ijs quæ ipse per se exercere debet, quam in communicatione Prouincialibus, & Visitatoribus, ac alijs quibuscunque Superioribus per ipsum facienda, integre & inuiolate conferrentur, quoniam. vt ratio ipsa docet, & Ignatius fundator prudenter animaduertit, ad hoc vt Societas bene gubernetur, valde expedit, vt Præpositus Generalis omnem habeat in ea auctoritatem ad ædifica-

tio-

tionem, ex qua præter cætera quam plurima, illud sequetur commodi, vt vniuersus Ordo ad monarchicam gubernationem compositus maxime seruetur vnitus, ipsiusque membra per vniuersum orbem dispersa, per omnimodam hanc subordinationem suo capiti colligata, promptius atque facilius a summo capite Christi in terris Vicario, ad varias functiones iuxta eorum peculiarem vocationem, ac speciale votum dirigi, atque moueri possint. Quod vero attinet ad dimissionem, Declaramus formam iudiciariam adhibendam non esse, sed modum in Constitutionibus præscriptum, & hætenus in ipsa Societate seruatum, de cetero seruari volumus, nempe vt etiam sine aliquo processu, tela, aut ordine iudiciario, ac nullis terminis etiam substantialibus seruatis, sola facti veritate inspecta, culpæ vel rationabilis causæ tantum ratione habita, ac personarum, aliarumque circumstantiarum, quarum consideratio sit cum caritate & prudentia coniuncta, procedi possit, auctoritate prædicta declaramus, & decernimus. Quin etiam omnes facultates, omnemque iurisdictionem, quod ad subditorum correctionem & punitionem pertinet, quibus cunque Ordinibus, eorumque Generalibus hætenus concessas, non ad instar, sed æque principaliter ipsi Societati, eiusque Præposito Generali concedimus & elargimur. Quo

GREG.
XIII.

Formam iudiciariam in dimissionibus seruandam non esse.

Omnes facultates ad correctionem & punitionem alijs Ordinibus concessas, Societati eiusque Præposito conceduntur.

GREG.

XIII.

Nomen Societatis Iesu esse retinendum.

Societatis Religiosos emissis votis simplicibus, ad sacros ordines promoveri posse.

Ad nullum alium ordinem (Carthusiensium excepto) eis transire licet.

Ad sacerdotium, vel ad professionem aut cuiusvis gradus mutationem aspirare non debent.

Potestatem dimittendi, tanquam rem magni momenti ad Societatis conservationem, esse omnino retinendam.

vero ad reliqua, quæ in controuersiam vocata erant, sic statuimus. Nomen Societatis Iesu, quo laudabilis hic Ordo nascens, a Sede Apostolica nominatus est, & hætenus insignitus, perpetuis futuris temporibus in ea retinendum esse; ac Religiosos huiusmodi post emissæ vota, & si simplicia, ad sacros etiam presbyteratus ordines iuxta Summorum Pontificum concessiones, promoueri posse; eisdemque emissis huiusmodi votis, ad quemvis alium Ordinem Mendicantium, vel non Mendicantium (Carthusiensium dumtaxat excepto) transire minime licere. Laicos vel alios non Sacerdotes ad Sacerdotium, vel eosdem aut qui Sacerdotes sunt, ad professionem, aut cuiusvis alterius gradus mutationem aspirare non debere. Potestatem quoque a Societate dimittendi quosvis non professos, ab hac Sede Apostolica sæpius approbatam, eosque ab omni obligatione votorum iuxta Constitutiones, & diplomata huiusmodi emissorum, per dimissionem ipsam, per quam vota prædicta cessant, liberandi, tamquam rem magni momenti ad Societatis puritatem, & conservationem retinendam, omnino ratam, intactam, & illibatam esse volumus. Et ut perturbatorum, & contradicentium audacia coerceatur, ac ne ipsi, vel pernicioso eorum exemplo alij in posterum quæ ab hac Apostolica Sede semel stabilita sunt, præcipue circa Regularium

larium Ordinum institutionem, & confirmationem, in quibus alioquin ad eandem Sedem tantum manus apponere spectat; impugnare aut enervare impune præsumant, aut villo modo valeant; Præcipimus in virtute sanctæ Obedientiæ vniuersis & singulis personis, tã secularibus, quam quorumvis Ordinum regularibus, cuiuscunque status, gradus, & præminentia existant, euam si Episcopali, Archiepiscopali, Patriarchali, aut alia maiori ecclesiastica dignitate, seu Cardinalatus honore, vel mundana quauis auctoritate, seu excellentia præfulgeant; ipsis vero Regularibus etiam dictæ Societatis Religiosis, sub pœnis excommunicationis latæ sententiæ, necnon inhabilitatis ad quauis officia, & dignitates, vocisque tam actiuæ, quam passiuæ priuationis, eo ipso absque alia declaratione incurrendis, quarum absolutionem Nobis ac Successoribus nostris dumtaxat reservamus, ne dictæ Societatis institutum, Constitutiones, aut decreta, vel ex eis quippiam, aut ex præmissis omnibus articulis quemlibet, vel aliud quid supradicta concernens, etiam maioris boni, aut zeli, seu quouis alio quæsito colore, aut prætextu directe, vel indirecte impugnare, vel immutari, alterari, aut formam aliam seu rationem circa ea induci curare, aut contra, vel præter ea, seu quauis alia ipsius instituti substantialia agere: vel quippiam vlli alij, præterquam

GREG.
XIII.

Perturbato
rui audacia
coercetur.

Præcipitur
omnibus in
virtute san-
ctæ obedi-
entiæ.

Regularibus vero
etiã sub ex-
communicationis latæ
sententiæ, &
inhabilitatis,
ac vocis
actiuæ, &
passiuæ pri-
uationis
pœnis eo ip-
so incurren-
dis.

Ne Societa-
tis institu-
tum, consti-
tutiones, aut
decreta, vel
ex ijs aut il-
la cõcernen-
tibus quip-
piam impu-
gnent vel
alterari cu-
rent.

GREG.
XIII.

Aut contra
vel præter
ea agât, vel
quippiam
vlli alij al-
terandum
præterquã
Ro. Pontifi-
ci idque im-
mediate vel
per legatũ,
aut Societa-
ti vel Præ-
posito pro-
ponant.

Innouãtur
pœnæ Con-
stit. se. re.
Greg. XIII.
omniaque
in ea contẽ-
ta confir-
mantur.

Præsentēs
de surre-
ptionis vi-
tio notari
non posse.

Nec sub qui-
busuis reuo-
cationibus
cõprehendi.

quam Nobis, aut Romano Pontifici pro tem-
pore existenti, idque immediate, vel per no-
strum, aut Sedis Apostolicæ Legatum seu Nũ-
cium, vel ipsius Societatis generali Congre-
gationi, aut Præposito Generali, addendum,
ininuendum, aut immutandum, siue alteran-
dum proponere quoquo modo audeant vel
præsumant. Pœnas denique omnes in Grego-
rij XIII. prædecessoris prædicti Constitutio-
ne (Ascendente Domino) contentas, ac Con-
stitutionem eandem, cum omnibus & singu-
lis in ea contentis, ac si omnia ad verbum
præsentibus infererentur, per præsentēs ap-
probamus, & innouamus. Decernentes præ-
missa omnia & singula, necnon præsentēs, ac
in eis contenta quæcunque nullo vnquam tẽ-
pore, etiam ex eo, quod interesse forsã habẽ-
tes ad id vocati non fuerint, vel alio quocun-
que prætextu, & ex quauis causã quantum-
uis vrgenti, legitima, & rationabili, de surre-
ptionis, vel obreptionis vitio, aut intentionis
nostræ, vel alio quouis defectu notari, impu-
gnari, inualidari, retractari, annullari, reuoca-
ri, ad viam iuris reduci, in dubium, vel contro-
uersiam reuocari, aut aduersus illa quodcun-
que iuris, facti, vel gratiæ remedium impetra-
ri posse vel debere; Nec sub quibusuis similiũ
vel dissimilium gratiarum reuocationibus, su-
spensionibus, limitationibus, modificationi-
bus, derogationibus, aut alijs contrarijs dispo-
sitiõ-

sitionibus comprehendi, sed ab illis semper excepta, & quoties emanabunt, toties in pristinum & eum, in quo antea quomodolibet erant, statum restituta, reposita & plenarie redintegrata, ac de nouo etiam sub Dat. per Societatem illiusque Prepositum Generalem, & alios Superiores prædictos quandocunque eligenda, de nouo concessa, ac etiam confirmata & approbata, validaque, efficacia & illibata, etiam absque eo quod desuper a dicta Sede illorum ulterius restitutio, reuvalidatio, confirmatio, seu noua concessio impetranda sit, fore, & esse, suosque plenarios, & integros effectus sortiri, & obtinere, ac easdem præsentis litteras ad probandum plene omnia & singula præmissa sufficere, nec ad id alterius probationis adminiculum requiri. Sicque in præmissis omnibus & singulis per quoscunque Iudices, & Commissarios, etiam causarum Palatii Apostolici Auditores, ac S. R. E. Cardinales, etiam de latere legatos, in quauis causa & instantia, sublata eis, & eorum cuilibet quauis aliter iudicandi, & interpretandi facultate & auctoritate, iudicari, & definiri debere: Nec non irritum & inane quicquid secus super his a quoquam quauis auctoritate scienter, vel ignoranter contigerit attentari. Mandantes vniuersis & singulis Patriarchis, Archiepiscopis, Episcopis, ac cæteris Ecclesiarum, & locorum etiam Regularium Prælati per vniuersum

GREG.
XIII.

Sic iudicari
debere.

Mandatur
Ordinarijs
vt curent
præsentis
litteras ab
omnibus ob
seruari.

GREG.
XIII.

Non obstan-
tibus.

sum orbem constitutis, ut præsentis litteras in
suis quique Ecclesijs prouincijs, ciuitatibus,
diocesibus, & iurisdictionibus, ab omnibus in-
uiolate obseruari. Quin etiam Præpositum, ac
personas Societatis huiusmodi defendât, eos-
que præmissis omnibus & singulis pacifice
frui faciant & gaudere; non permittentes,
ipsos per quoscunque quomodolibet molesta-
ri; contradictores per censuras ecclesiasticas,
& alia iuris, & facti remedia opportuna, ap-
pellatione postposita, compescendo, inuoca-
to ad hoc etiam, si opus fuerit, auxilio brachij
sæcularis. Non obstantibus tam ipsius Sixti
prædecessoris super modo, & forma admittē-
di nouitios ad religionem, quam alijs quibus-
uis constitutionibus, & ordinationibus Apo-
stolicis, aut decretis per eundem, vel quosli-
bet alios prædecessores nostros, etiam viua vo-
cis oraculo, aut alias quomodolibet editis, ac
etiam aliorum Ordinum iuramento, confir-
matione Apostolica, vel quauis firmitate alia
roboratis statutis, & consuetudinibus, priuile-
gijs quoque, indultis, & litteris Apostolicis
quibuscunque huiusmodi Ordinibus, Vni-
uersitatibus, locis, aut personis per quoscun-
que Romanos Pontifices prædecessores no-
stros, ac Nos, & Sedem prædictam, etiam Mo-
tu proprio, & ex certa scientia, ac de Aposto-
licæ potestatis plenitudine, & cum quibusuis
irritatorijs, annullatiuis, cassatiuis, reuocati-
uis,

GREG.
XIII.

uis, modificatiuis, præseruatiuis, exceptiuis, declaratiuis, mentis attestatiuis, ac derogatori-
 arum derogatorijs, alijsque efficacioribus & insolitis clausulis, irritantibusque, & alijs decretis in genere, vel in specie, ac alias quomodolibet etiam pluries concessis, confirmatis, & innouatis. Quibus omnibus & singulis etiam si in eis caueatur expresse, quod illis nul-
 latenus, aut non nisi sub certis modo, & forma in illis expressis derogari possit, pro illorum sufficienti derogatione, de illis eorumque totis tenoribus specialis, specifica, & expressa mentio habenda, seu aliqua alia exquisita forma ad hoc seruanda foret; tenores huiusmodi præsentibus pro sufficienter expressis habentes, illis alias in suo robore perman-
 suris, hac vice dumtaxat specialiter, & expresse derogamus, contrarijs quibuscunque. Aut si aliquibus communiter, vel diuim ab eadem Sede sit indultum, quod interdici, suspendi, vel excommunicari non possint per litteras Apostolicas non facientes plenam & expressam, ac de verbo ad verbum de indulto huiusmodi mentionem. Præsentis autem Constitutionis & gratiæ communicationem omnibus alijs, qui sua priuilegia cum ipsa Societate copiose participant, participareque poterunt quomodolibet in futurum, fieri omnino prohibemus. Ceterum volumus, ut præsentium transumptis etiam impressis manu Secretarij dictæ Societatis,

Præsens concessio non communi-
catur.

Transumptis habeatur fides.

GREG. tatis, vel Notarij publici subscriptis, & sigillo
XIII: Præpositi Generalis eiusdem Societatis, vel
 alterius personæ in dignitate Ecclesiastica,
 constitutæ munitis, eadem omnino fides ha-
 beatur in iudicio, & extra illud, quæ litteris ip-
 sis originalibus haberetur, si essent exhibitæ
 vel ostensæ. Nulli ergo omnino hominum li-
 ceat hanc paginam nostrę approbationis, con-
 firmationis, suppletionis, statuti, ordinatio-
 nis, decretorum, concessionis, elargitionis,
 præcepti, reservationis, innouationis, manda-
 ti, declarationis, derogationis, prohibitionis,
 & voluntatis infringere, vel ei ausu temerario
 contraire. Si quis autem hoc attentare præ-
 sumperit, indignationem Omnipotentis Dei,
 ac beatorum Petri, & Pauli Apostolorum se-
 nouerit incursum.


Dat. Romæ apud Sanctum Petrum, Anno
 Incarnationis Dominicæ M.D.XCl. Quarto
 Kal. Iulij, Pontificatus nostri anno primo.

L. Dat.

M. Vestrius Barbianus,

A. de Alexijs.

Registrata apud Marcellum Secretarium.





Congregatio Generalis V

Ex decreto so explicari debet Novitiis promissionem illam de ingrediendo Societatem, que fit in Formula votorum, esse votum, quo obligatur ad recipiendum gradum Coadiutoris Formati, vel Professi, prout Praepositus Generalis iudicaverit.

Ex decreto so explicandus est locus examinationis generalis cap. 7. §. 2. quod qui in æquitudinem incidit in quocumque obsequio Societatis postquam emiserit vota biennio exacto, is dimitti non potest, nisi ipse conventus esset.

Et rursus qui in Scholasticum admissus fuerit si emissis votis post biennium inveniebatur ineptus ad studia, et ad alia domestica ministeria posset in vigore a Societate dimitti quia adhuc in probatione est ad ulteriores gradus.

Go ma.

Et magis si illa inutilitas esset cum aliqua culpa voluntatis conjuncta: Ex aequitate samentis nulla sit culpa consulatur Generalis.

Congregatio Generalis VI

Canon X

Cum observatio Regularum q. et 10. Summarij ex cap. 9. exam. 8. et 9. desumptarum ad disciplinam Religiosam conservandam maxime conducatur; Congregatio hęc circa illas declarat.

1. Licetum esse omnibus nostris manifestare Superiori, ut Patri, quodcumque delictum alterius, sive leve, sive grave, et hunc esse sensum Regularum, cum ex illis verbis cap. 4. exam. constet; Nostros cedere cuicumque juri Patris, quod huic manifestationi obstarı potest, et facultatem facere omnibus deferendi ad Superio.

riores quaecumque de illis notata fuerint. Versa. 2.
autem Regulae Per quemvis qui extra confes-
sionem ea acceperit intelligi de illis, quae ab ali-
quo alio notata, et observata fuerint, non autem de
iis, quae ipsemet secreto, et consilii petendi gra-
tia, ut dirigatur, vel iuvetur alteri communicaverit.

Nec opus esse nos habere expectare, ut rogentur a
superioribus, ut ea manifestent, cum verba illas
Praesertim ubi a superiore fuerit ita praescriptum
satis declarent debere eos esse paratos ad hanc ma-
nifestationem non expectato superioris praescripto.

In delictis vero, quae vergunt in detrimentum boni co-
munis, aut damnum imminens scilicet Personae qualis
sunt infectiva aliorum, et nociva bono Religionis,
non solum posse, sed etiam teneri quemque eo ma-
nifestare superiori, ut Patri, ut provideat secreto, et
prudenter tam bono subditi, quam Religionis.

Quando autem prudenter iudicaretur non posse
adhiberi sufficiens remedium, quo provideatur bono
co:

comuni, vel tertiae personae, nisi assumatur in ea re officium Iudicis, tenebitur subditus ad denunciationem judicalem superiori faciendam. Quomodo autem in ea re se gerere debeat Superior dicebatur in instructione.

Congregatio Generalis VIII.

Decretum XVII.

1. Omni omnino Nobis bonorum suorum administratione, ubi primum Novitiatum ingressi fuerint exuere se debere
2. Administrationem vero salium primo quadriennio currente, pro Personarum, ac Provinciarum qualitate iudicio Provincialis illius committendam, qui majori eam fide tractaturus putatur.
3. Quadriennii tempore, quo bonorum suorum dominium retinent, licet nihil ex annuis proventibus, sola voluntate sua in proprios, aut nostrorum usus convertere, aut certo alicui Col. legio

multoq. minus loco, in quo resident, donare possint;
poterunt tamen ex illis, assensu Provincialis
accedente, ea iis locis, ac piis causis per modum
Elemosine applicari, quæ maxime tali subsidio
egere Provincialis in Domino judicaverit.

Honorum dominio, si quod habent, etiam pen- 4
sionum, ac censuum, sive realium, sive personalium,
eorumq. sive perpetuorum, sive vitalitiorum, ubi pri-
mum veritatem, et patrias leges licebit, absolu-
ta inter vivos donatione, quin, et jure omni suo,
quando id consultum S. N. judicaverit, et fieri
imperaverit, exuere se teneantur.

Pensiones tamen Ecclesiasticæ, similiaq. gene-
rum horum, quæ mere personalia sunt, et super
nostrorum personis constituuntur, quibus absolute,
et in solidum abdicare se nos non expedit. S.
S. N. judicio distribuenda sunt, ita ut nullæ talium
administratio apud illos maneat

5 Quadriennium tamen ab ingressu Societa-
tis bonorum possessionem, censuit Congregatio
juxta ordinationes P. M. Claudii illis permittenda;
In cujus prorogatione nulli; praeter quam Genera-
li, idg. ex gravi causa dispensare liceat, qua
in re praecipue spiritualis boni, et Possessionis ra-
tio habeatur.

6 Quando vero judicio P. M. ob graves causas ul-
tra quadriennium prorogata possessio fuerit, nul-
lo modo ex annuis post Novitiatum proventibus, vo-
luit quicquam Possessionibus aliorum posse accrescen-
sed in causas pias e Provincialis judicio fructus
tales cum in potestate nostrorum fuerint, impen-
dendos censuit.

7 Quod si forte ante quadriennium expletum
perfectionis studio ducti abdicare. v. solidum su-
is in nostrorum usus voluerint, solius P. M. judicio,
committendam hanc abdicationem censuit, qui ha-